

四庫全書

史部

欽定四庫全書

史部

欽定皇輿西域圖志卷二十一

詳校官通政使_臣 夢吉

檢討_臣 德生覆勘

總校官候補中允_臣 王燕緒

校對官中書_臣 吳樹萱

謄錄監生_臣 褚北麟

欽定四庫全書

欽定皇輿西域圖志卷三十一目錄

山二

天山正幹

天山

額得墨克達巴

博克達鄂拉

托克喇鄂拉

阿拉癸鄂拉

哲爾格斯鄂拉

烏可克達巴

孟克圖達巴

哈屯博克達鄂拉

古爾班多博克鄂拉

額林哈畢爾噶鄂拉

庫舍圖達巴

們都招達巴

鄂蘭達巴

額勒伯克鄂拉

額布圖達巴

烏得音郭勒達巴

納喇特達巴

汗騰格里鄂拉

額什克巴什鄂拉

阿勒坦呼蘓鄂拉

木素爾鄂拉

薩瓦布齊鄂拉

卓哈達巴

伯得里克鄂拉

烏成庫什達巴

喀克沙勒鄂拉

額圖克達巴

哈喇鄂拉

欽定皇輿西域圖志卷二十一目錄

欽定四庫全書

欽定皇輿西域圖志卷二十一

山二

天山正幹

天山

天山一名祁連一名雪山一名白山又名折羅漫山其山遠自葱嶺分支自喀什噶爾之北迤東而行經烏什阿克蘇庫車哈喇沙爾闢展之北又東

行入鎮西府界至塔勒納沁而止皆曰天山東西
綿亘三千餘里層峯疊嶂隨地異名蓋以百數其
最著者自蔥嶺分支東六百里為喀克沙勒鄂拉
又東六百里為薩瓦布齊鄂拉又東三百里為木
素爾鄂拉木素爾之為言雪也即古所謂雪山者
也又東四百里為汗騰格里鄂拉騰格里之為言
天也即古所謂天山者也又東五百里為納喇特
達巴又東北三百里為額布圖達巴又東三百里

為哈屯博克達鄂拉又東南五百里為阿拉癸鄂
拉又北二百里為博克達鄂拉又東六百里入鎮
西府境詳見卷
二十山南大河橫亘分支絕少山北自
額布圖達巴分支西北行至庫隴奎格登諸鄂拉
自鎮西府境分支東北行又折而西北至阿勒坦
鄂拉即古金山皆自天山分脉有龍象回顧之勢
於北天山全體形勢益增雄壯

山海經三危山西三百五十里曰天山

漢書西域傳西域南北有大山東西六千餘里自車師前至庭隨北山波河西行至疏勒為北道

通典自張掖而西至於庭州相去三千五百六十里而山皆周徧

唐書薛仁貴傳詔副鄭仁泰為鐵勒道行軍總管時九姓衆十餘萬令驍騎數十來挑戰仁貴發三矢輒殺三人於是虜氣懾皆降軍中歌曰將軍三箭定天山壯士長歌入漢關九姓遂衰鐵勒有思

結多覽葛等部先保天山及仁泰至懼而降地理
志折羅漫山亦曰天山

宋史外國傳高昌西距西天步路涉雪山葱嶺皆
數千里回鶻本國東至黃河西至雪山

按天山東西三千餘里實止一山而漫嶺殊形
稱名互異即西域傳所謂北山也通典自張掖
至庭州者僅指迪化州迤東之山而言迪化州
治即烏魯木齊固即唐庭州地也舊一統志稱

天山一名白山自哈密東北境綿亘而西經闕
展境又西入準噶爾界殆三千餘里又西南與
蔥嶺接其間土名不一當時西境半屬夷疆故
第舉天山全局之通稱其自闕展以西或未及
周知悉考今尺山寸石均入

皇輿東西三千餘里不難按地周稽而南居回部北
宅準夷保界荒陬形勢居最令舉大凡於此至
其峯嶺之隨地異名者仍自鎮西府西出逐條

分載焉

額得墨克達巴

額得墨克達巴在托來達巴西七百餘里闢展北
為博克達迤東之支山察罕烏蘓納里特布拉克
發源於其北麓

山海經天山西二百九十里曰沕山西行百里至
於翼望之山郭璞注翼望或作土翠山

按山海經載天山注云即漢貳師擊右賢王處

當指今哈密及鎮西府境內北山而言由是西
行四百里內沕山翼望山以今道里計之應在
今鎮西府以西額得墨克達巴以東天山正幹
之內也

博克達鄂拉

博克達鄂拉在額得墨克達巴西天山最高峯也
東南距闕展二百里高八里山脉自烏魯木齊東
南之托克喇鄂拉折而東北行一百六十里高峯

突起為迪化州境東北一大屏障托克三郭勒發
源南麓多倫庫里葉圖諸布拉克發源北麓乾隆
二十年討準噶爾二十二年追討阿睦爾撒納大
兵道出其麓二十五年西域平軍旅凱旋咸祭告
自是秩於祀典每歲春日致祭

告祭博克達鄂拉文

朕恭承

鴻業撫馭寰區康乂柔懷中外一視準噶爾部落向遠王

化篡弒相仍因而內亂達瓦齊又復殘虐其屬分崩離
析人不聊生雖在殊荒均之赤子朕何忍不為拯救坐
視阡危爰整王師分道並進今西路大兵道出神境惟
神建標西域聳峙萬山形勢削成光靈燁赫尚其默相
翼我明威期迅奏乎膚功永牧寧夫遠服虔申昭告用
布馨香惟神鑒焉乾隆二十年月日

朕纘承

祖

緒中外一家撫順討逆式昭柔遠之模布德宣威丕振

詰戎之畧茲以西陲小醜負恩作叛煽惑邊疆實自外
於生成斷難寬夫勦戮爰命定邊將軍喀爾喀扎薩克
和碩親王成滾扎布整師鞠旅盡掃餘氛大軍道出神
境惟神建標西域聳峙萬山形勢削成光靈燁赫尚其
明昭翊應默佑膚功期計日以執俘聿彰武績用寧邊
而敷化誕擴鴻圖敬薦馨香惟神鑒格乾隆二十二年
月日
朕繼序丕基輯寧函夏遐方效順諸部歸心乃逆回霍

集占波羅泥都者自我師定有伊犁拔諸囚繫既負孤
恩之惡尤干黨逆之誅朕命將移兵奉辭伐罪頻摧衆
醜六師皆破竹而前屢克堅城萬里如建瓴而下逖聽
者嚮風納降者恐後遂械貳負之尸獻防風之骨弟兄
駢首申國憲於藁街遠近傾心撫皇輿於絕漠纒

兩朝而歲事未五載而告功仰賴洪庥實資默贊曩者大
軍變伐宣威曾告山靈今茲重譯歸懷將禮用酬神貺
右享還齊於嶽瀆西陲永奠於遊荒薦我馨香尚其敬格

乾隆二十五年月日

歲祭博克達鄂拉文

惟神作鎮西陲効靈中土出雲降雨陰陽盼鑿之功切
漢憑霄龍虎縈回之勢邁祁連而聳秀嘉名並王會圖
中指懸圃以建標顯位在大荒經外式昭有赫永奠無
疆朕繼序重熙牧寧六合日月照臨之地盡入版圖乾
坤覆載之區悉歸亭育萬類登諸仁壽百神攝以懷柔
惟茲烏魯木齊實當勝地巴爾哈達舊接神臯山靈之

保障斯存境內之屏藩攸寄幅員計里不殊左右戶庭
屯牧如雲遙接東西侯尉是宜登之祀典載在禮官爰
卜日於春初俾定期以時享升香瘞玉適均列嶽之班
宣氣調神常峙塞垣之域式扶鼇紀丕鞏鴻圖用薦必
芬惟祈頌格

魏書高昌傳北七十里有貪汗山夏有積雪此山
北鐵勒界也

隋書鐵勒傳大業元年突厥處羅可汗擊鐵勒諸

部遂叛拒處羅立俟利發俟斤契弊訶楞為易勿
真莫何可汗居貪汙山莫何勇毅絕倫伊吾高昌
焉耆諸國悉附之

唐書突厥傳吐陸入寇伊州安西都護郭孝恪敗
之吐陸以處月處密兵圍天山而不克回鶻傳西
突厥處羅可汗之殺鐵勒諸酋也其下往往相率
叛去推契苾哥楞為可汗據貪汙山

按博克達鄂拉在鎮西府西關展北鎮西府古

伊州闕展古高昌則博克達鄂拉當即高昌北
七十里之貪汗山吐陸可汗自伊州敗還而圍
天山宜在此地也北史魏書唐書俱作貪汗山
惟隋書作貪汗疑傳寫之訛

托克喇鄂拉

托克喇鄂拉在博克達鄂拉西南一百六十里迪
化州東南五十里山脈自哲爾格斯鄂拉東行至
此停蓄折而北即今迪化州東障也

按漢書西域傳載蒲類國治天山西疏榆谷天山大形勢東西綿亘而曰在天山西者自今哲爾格斯鄂拉折而北由托克喇鄂拉至博克達鄂拉二百里間南北綿亘蒲類國固當倚其西麓則所謂疏榆谷者應在今托克喇鄂拉左右山谷之間其於方位為適相合也

阿拉癸鄂拉

阿拉癸鄂拉在托克喇鄂拉西南二十里迪化州

南入東谷口西行一百三十里山深林密人馬登陟崖坎六十餘里徑轉險窄駝馬難行又七十里仍在谷內倚山一角有土城城內鑿山如梯狀為展闢西至裕勒都斯關隘

哲爾格斯鄂拉

哲爾格斯鄂拉在阿拉葵鄂拉西北三十里迪化州南古爾班哲爾格郭勒出其西山脈自孟克圖達巴東北行四十里為烏可克達巴又東行三十

里至此

烏可克達巴

烏可克達巴在哲爾格斯鄂拉西三十里為迪化州西南屏阿勒塔齊耶勒發源北麓

唐書突厥傳賀魯寇廷州詔左武衛大將軍梁建

方等擊之處月未邪孤注者引兵附賊據牢山建方等攻之衆潰追行五百里斬孤注上首九千級虜其帥六十永徽四年即處月置金滿州

按唐北庭都護府本廷州

地理志作庭州

以賀魯等部

落置統縣四金滿輪臺後庭西海即以賀魯為

瑤池都督處于廷州後賀魯犯西廷二州駱宏

義請寬處月處密諸部專誅賀魯而處月朱邪

孤汪遜附賀魯據牢山及梁建方攻克後罷瑤

池都督即處月部置金滿州隸北庭與廷州屬

縣名同知其境地毗接今迪化州為唐北廷所

屬之後庭金滿縣則當時處月附賀魯而據牢

山應屬今迪化州南境之山托克喇阿拉葵哲爾格斯烏可克諸鄂拉達巴蓋必居一於此也

孟克圖達巴

孟克圖達巴在烏可克達巴西南四十里昌吉縣治南昌吉羅克倫兩郭勒發源北麓山脈自西北三百里之哈屯博克達鄂拉東行二百三十餘里逾登努勒台境折而東南五十餘里又東行約百餘里至此岡巒特峻

哈屯博克達鄂拉

哈屯博克達鄂拉在孟克圖達巴西北三百里綏來縣南哈布齊垓北哈齊克瑪納斯兩郭勒發源北麓多木達都哈布齊垓郭勒出其南山脈自額林哈畢爾噶鄂拉東南行六十里為古爾班多博克鄂拉又東四十里至此其高不及迪化州東境之博克達鄂拉而勢亦聳峻天山次高峰也

唐書突厥傳吐陸以處月處蜜兵圍天山而不克

郭孝恪拔處月俟斤之城抵遏索山降處蜜部而
還

按唐處月部為金滿州在北廷今為迪化州以
東博克達鄂拉以北之地處蜜部居處月西在
今瑪納斯郭拉左右當哈屯博克達鄂拉之北
吐陸以處月處蜜兵進圍天山者迪化州東境
之博克達鄂拉也孝恪追北之會先拔處月城
後抵遏索山是遏索山必在處月之西為今之

哈屯博克達鄂拉而處密居山之北兵至其境
故降也

古爾班多博克鄂拉

古爾班多博克鄂拉在哈屯博克達鄂拉西四十
里瑪納斯南哈布齊垓北烏蘭烏蘇發源北麓

額林哈畢爾噶鄂拉

額林哈畢爾噶鄂拉舊音額林哈畢爾罕在古爾
班多博克鄂拉西北六十里和爾鄂斯安濟哈雅

兩郭勒發源北麓巴倫哈布齊垓郭勒出其南山
脈自額布圖達巴東行二百二十里踰安濟哈雅
至此乾隆二十二年討阿睦爾撒納遣官祭告二
十四年西域平秩於祀典每歲春秋致祭

告祭額林哈畢爾噶鄂拉文

朕寅紹丕基輯寧函夏荷百靈之效順美報必伸當萬
里之奏功明裡咸秩惟神遐荒迥峙靈應夙昭高埒天
山遠通月融屬當逆賊阿睦爾撒納負恩狡叛竄迹僑

棲收拾殘黎誘招諸部復鳴張而起事旋蠶食以逞謀
游牧至斯披猖寢甚鄰近皆潛為烏合逆酋漸欲肆螳
當已而王旅驟加賊軍輒駭四山草木盡助聲威諸嶺
風雲俱增叱咤奔鹿遂不遑擇蔭窮魚乃自絕遊魂雖
追躡逋逃又閱時而竣事而摧拉枯朽實從此以振威
信乎奉天討以出師明神威祐茲者藏武功而底績秩
祀宜申用昭右序之文遣祠官而致享永作西陲之鎮
鞏邊圉以教寧乾隆二十二年月日

歲祭額林哈畢爾噶鄂拉文

惟神保障遐方奠基西土層巒內拱在漠南綏靖之前
協氣遙迎當閩外奮揚之日逐飛廉於塞外八公之草
木皆兵示象鼎於寰中九牧之神姦悉化輯寧有地報
享宜頌朕底定荒陬又安絕域懷柔所及龍堆盡列於
版圖撫馭攸加月窟咸通於聲教叛酋潰竄頭屢觸於
不周勝旅先登尸遂陳夫貳負凡膚功之迅奏實靈效
之克彰用奉明禋永垂嘉典峙金方而作鎮著神功於

華嶽以西表翠障以為屏秩祀典於流沙之外尚其出雲降雨遠敷惠澤於邊疆惟茲酌醴牽牲敬念普存於帝力神其來格鑒此苾芬

按是山在博克達鄂拉西八百里和屯博克達鄂拉西一百里博克達鄂拉尊如人首額林哈畢爾噶譯言硬肋居元首之左右天山最高峰為博克達則左右山皆可謂之額林哈畢爾噶今其方言猶以此為博克達左右山之通稱茲

據告祭所在定為哈屯博克達西百里之山而推其名義如此

庫舍圖達巴

庫舍圖達巴在額林哈畢爾噶鄂拉西南五十里
巴倫哈布齊垓郭勒經其東麓山脈自額林哈畢
爾噶鄂拉分支南行五十里至此又南少西五十
里為們都招達巴又南少西一百里為鄂蘭達巴
又南少西五十里為額勒伯克鄂拉皆傍東裕勒

都斯郭勒之東而繞於其南為天山正幹之分支
們都招達巴

們都招達巴在庫舍圖達巴西南五十里東裕勒
都斯郭勒東嶺勢衰延南北相屬盡裕勒都斯東
境

鄂蘭達巴

鄂蘭達巴在們都招達巴西南一百里東裕勒都
斯郭勒南自們都招達巴南行五十里過東裕勒

都斯郭勒發源處折而西五十里至其地

額勒伯克鄂拉

額勒伯克鄂拉在鄂蘭達巴西南五十里東裕勒
都斯郭勒南自鄂蘭達巴西又南踰山口為裕勒
都斯東西兩郭勒合流東注海都郭勒處烏爾圖
布拉克出其南

額布圖達巴

額布圖達巴在額林哈畢爾噶鄂拉西三百里東

裕勒都斯郭勒北額布圖郭勒發源北麓北噶蘓
台格納特烏里雅蘇台諸布拉克出其南山脈自
伊犁南境之汗騰格里鄂拉東行五百里為納喇
特達巴又東北六十里為烏得音郭勒達巴又東
北五十里至此東西橫亘其東南一支由額林哈
畢爾噶鄂拉東行為迪化州南境之山其西北一
支由哈喇古顏鄂拉西北行為伊犁北山額布圖
達巴其分脈處也

烏得音郭勒達巴

烏得音郭勒達巴在額布圖達巴西南五十里東
裕勒都斯郭勒西空格斯郭勒發源西麓山脈自
納喇特達巴東行六十里折而北至此東谷口通
裕勒都斯西谷口通空格斯東西谷口相距五十
里

納喇特達巴

納喇特達巴在烏得音郭勒達巴南六十里空格

斯南山脈自汗騰格里鄂拉由特克斯郭勒南折而北又南經西裕勒都斯郭勒北蜿蜒東走五百里至此又折而北

汗騰格里鄂拉

汗騰格里鄂拉在納喇特達巴西五百里特克斯郭勒發源北麓東北距伊犁一百五十里南距庫車三百里山脈自西南四百里之木素爾鄂拉東行分二支其北一支由圖斯庫勒東南折而東北

至特克斯郭勒源南其南一支自拜賽喇木庫車
之北折而北行逾西裕勒都斯郭勒發源處折而
西與北一支合汗騰格里當其交會處山勢尊嚴
羣巒環拱為天山之主峯

唐書西突厥傳

初曷薩那朝隋被留不遣乃共立

達頭號射匱可汗建廷龜茲北之三彌山玉門以
西諸國多役屬與東突厥亢

按龜茲為今庫車迤北諸山汗騰格里為大應

即唐時三彌山射匱可汗當建廷山北也

額什克巴什鄂拉

額什克巴什鄂拉在汗騰格里鄂拉南二百里山形寬廣產硫黃哈喇庫勒發源東南麓赫色勒鄂勒東一源出西南麓又東一源出南麓是山為庫車北屏距庫車城百里山脈自木素爾鄂拉分支東南行百餘里為阿勒坦呼蘓鄂拉至此北與汗騰格里鄂拉合又東行一支接庫克納克達巴詳

見天山南路

魏書西域傳龜茲國西北大山中有如膏者流出成川行數里入地如餽餽甚臭服之髮齒已落者能令更生病人服之皆愈

隋西域傳白山一名阿羯山常有火及烟卽是出碶砂之處

唐書西域傳伊邏羅城北倚阿羯田山亦曰白山常有火

按今庫車古龜茲地伊邏羅城唐龜茲國王居之則今庫車城北之額什克巴什鄂拉應即唐書龜茲國北之阿羯田山隋西域傳所稱阿羯山也史稱阿羯田山出碯砂今額什克巴什鄂拉產硫黃考本草石硫黃一名黃碯砂而字書無碯字疑碯砂即碯砂若魏書所云膏流如川能令齒髮更生愈病者今不可考矣又考宋王延德高昌行記載北廷北山中亦出碯砂有烟

火則隋所謂阿羯山者又疑與今之迪化州為
近

阿勒坦呼蘇鄂拉

阿勒坦呼蘇鄂拉在額什克巴什鄂拉西一百餘
里赫色勒郭勒西一源出其南麓山脈自木素爾
鄂拉東南行百餘里至此為賽喇木之北屏

木素爾鄂拉

木素爾鄂拉舊音穆薩爾在汗騰格里鄂拉西南

四百里圖斯庫勒南拜城北哈喇烏蘇哈布薩朗
郭勒發源東南麓木素爾郭勒兩源皆出其南麓
綽爾噶布拉克都楚特郭勒阿察哈喇郭勒出其
西山脈自西三百里之薩瓦布齊鄂拉東行至此
峯巒峻拔冰雪嵯峨艱於行旅自鄂拉北東北行
通伊犁乾隆二十五年秩於祀典每歲春秋致祭
歲祭木素爾鄂拉文

惟神德符艮止位在允維秀甲羣峯拔地倚天之勢靈

鍾絕徼出雲降雨之功匹蔥嶺以稱尊洵回中之巨鎮
臨于關而作障允塞外之隩區朕紹服丕基敦寧方夏
渠搜卽叙遂犁頡利之庭蒲海載清遠致防風之骨踰
二萬里而獻捷不四五年而成功維茲木素爾之山實
隣阿克蕪之域曩者六師奏凱式彰默佑之庥今茲百
部屯田聿顯懷柔之應是用登之祀典載在秩宗練吉
日以薦馨遣重臣而展告履縣肇舉巍乎列嶽鎮之班
盱蟹丕昭巋然作塞垣之固介以繁祉休有烈光陳此

卷二十一
苾芬庶其馥格

按古天山統名雪山即今西陲諸部氣候早寒
自鎮西府以西高巖積雪所在多有而阿克蘇
城東北木素爾鄂拉勢尤聳峯飛花攢玉倍於
他嶺是以雪山雖天山之通稱而茲嶺專有其
名也

薩瓦布齊鄂拉

薩瓦布齊鄂拉在木素爾鄂拉西南三百里圖斯

庫勒南阿克蘇北庫克墨爾根郭勒發源南麓山脈自喀克沙勒鄂拉東北行二百三十里為伯得里克鄂拉又東北二百四十里為卓哈達巴又東二百里至此岡嶺層沓綿亘東北境凡七百里

唐書西域傳漢姑墨國西三百里度石磧至凌山蔥嶺北原也水東流冬夏山谷積雪

按唐書西域傳稱自龜茲贏六百里有跋祿迦一曰巫墨即漢姑墨國又三百里至凌山是凌

山在龜茲西九百里也今薩瓦布齊鄂拉在庫車西北七百里似所謂凌山尚在其西然考唐書又云凌山西北五百里至素葉水城在今圖斯庫勒西則唐之凌山又當在今圖斯庫勒之南與薩瓦布齊鄂拉之方位適合更以東西七百餘里中大局考之東為木素爾鄂勒西為托什干達里雅皆出北山麓而東流自木素爾鄂拉以西嶺多雪難行皆與唐書所謂水東流春

夏積雪者相合是唐之凌山即不定為薩瓦布齊
鄂拉亦必在薩瓦布齊迤西一帶自庫車西行數
百里之間也

卓哈達巴

卓哈達巴在薩瓦布齊鄂拉西南二百里阿克蘇
之西北特木爾烏蘇郭勒出其東

唐書地理志溫肅州西北三十里至粟樓烽又四
十里度拔達嶺

按今阿克蘇為古溫肅卓哈達巴在其西北應
即溫肅州西北粟樓烽拔達嶺之舊地

伯得里克鄂拉

伯得里克鄂拉在卓哈達巴西南二百四十里

烏成庫什達巴

烏成庫什達巴在伯得里克鄂拉西一百里烏什
之西托什干達里雅出其東

喀克沙勒鄂拉

喀克沙勒鄂拉在伯得里克鄂拉西南二百三十里自額圖克達巴東北行至此踰山而北通布魯特境山南為喀什噶爾南北相距各三百餘里

額圖克達巴

額圖克達巴在喀克沙勒鄂拉西南三百里踰山而北通布魯特境山南為喀什噶爾山脈自蔥嶺分支由烏魯阿喇特達巴東北行三百里至此

哈喇鄂拉

哈喇鄂拉在額圖克達巴西北為其支山博羅和
什郭勒木什諾斯騰特們郭勒發源南麓

按蔥嶺分支自額圖克達巴東行為木素爾鄂
拉又東為汗騰格里鄂拉又為博克達鄂拉又
東入鎮西府境極於塔勒納沁鄂拉東西三千
餘里為天山正幹其南北諸山皆從此分支故
別叙於天山南北路諸山之首

欽定皇輿西域圖志卷二十一

欽定四庫全書

欽定皇輿西域圖志卷二十二目錄

山三

天山北路

拜塔克

哈喇莽奈鄂拉

古爾畢達巴

庫爾圖達巴

阿勒坦鄂拉

烏可克達巴

阿拉克鄂拉

博克達烏魯罕鄂拉

薩爾巴噶什達巴

古爾班奇喇鄂拉

阿爾察克鄂拉

阿斯哈圖達巴

朱爾庫朱鄂拉

塔爾巴噶台鄂拉

巴爾巴什鄂拉

通古斯巴什鄂拉

雅瑪里克鄂拉

阿顏台和洛鄂拉

巴顏哈瑪爾鄂拉

博羅哈瑪爾鄂拉

奇喇圖魯鄂拉

阿爾噶里圖鄂拉

哈喇古顏鄂拉

博羅布爾噶蘓鄂拉

阿布喇勒鄂拉

塔勒奇鄂拉

博羅和洛鄂拉

烘鄂爾鄂博

薩勒巴圖烏蘭布喇達巴

罕哈爾察海鄂拉

庫克托木達巴

阿勒坦特布什鄂拉

巴爾魯克鄂拉

鄂爾和楚克鄂拉

薩里鄂拉

色伯燕台鄂拉

呼察斯阿爾噶里圖鄂拉

察罕布古圖鄂拉

庫隴奎鄂拉

格登鄂拉

阿勒坦額墨勒鄂拉

莎達巴

他巴爾遜達巴

察察圖達巴

圖賚愛古爾鄂拉

布喀鄂拉

墨爾根西里鄂拉

阿奎鄂拉

阿斯哈達巴

伊爾該圖鄂拉

渾都賴鄂拉

庫古里克鄂拉

烏可克達巴

額得墨克達巴

庫穆什鄂拉

哈喇布拉克達巴

呼巴海鄂拉

巴噶布魯勒鄂拉

伊克布魯勒鄂拉

欽定皇輿西域圖志卷二十二目錄

欽定四庫全書

欽定皇輿西域圖志卷二十二

山三

天山北路

拜塔克

拜塔克在鎮西府西北境之哈布塔克西一百十五里山脉自鎮西府北山東行至塔勒納沁之北折而西北行為阿濟鄂拉又西行為哈布塔克又

西行至此盤迴千有餘里蓋天山分支也烏里雅蘇台布爾噶蘇台烏爾圖諸布拉克皆出其南麓按準噶爾舊疆在拜塔克以西故以此為天山北路諸山之始

又按後漢書陽嘉三年夏車師後部司馬率加特奴等千五百人掩擊北匈奴於閭吾陸谷四年北匈奴呼衍王侵後部帝以車師六國接近令敦煌太守發諸國兵及玉門關候伊吾司馬

合六千三百騎救之掩擊於勒山今考車師前
後部在博克達鄂拉東天山南北漢時呼衍王
近與相接應在哈密西北博克達鄂拉東北一
帶是以裴岑誅呼衍王碑即在哈密庫舍圖達
巴而後漢書所謂閻吾陸谷與勒山者亦當在
哈密西北博克達鄂拉東北一帶與今之哈布
塔克拜塔克哈喇莽奈鄂拉為相近也特其地
難確指為附見於此

哈喇莽奈鄂拉

哈喇莽奈鄂拉在天山北三百里拜塔克北東西
綿亘山脉亦自東而西北距赫色勒巴什淖爾一
百里又西一百里入於沙磧

隋書突厥傳其先國於西海之上為鄰國所滅男
女無少長盡殺之至一兒不忍殺則足斷臂棄於
大澤中有一牝狼每銜肉至其所此兒因食之得
以不死其後遂與狼交有孕焉彼鄰國者復令人

殺此兒而狼在側使者將殺之其狼若為神所憑
歛然至於海東止於山上其山在高昌西北下有
洞穴狼入其中遇得平壤茂草地方二百餘里其
後狼生十男其一姓阿史那氏最賢遂為君長故
牙門建狼頭纛示不忘本也

唐書沙陀傳處月居金娑山之陽

按自哈喇莽奈鄂拉而西岡巒相屬西過高昌
疑即隋書所謂高昌西北之山第其言荒渺遠

近道里不著於史難以深考若唐時沙陀居蒲類之東境有大磧為今迪化州東北一帶無疑則唐書所謂金娑山者應即今之哈喇莽奈鄂拉以其地居迪化州東北正當沙陀北境故也

古爾畢達巴

古爾畢達巴在額爾齊斯郭勒東北哈喇圖郭勒發源西麓山脉自鎮西府東北境之必濟鄂拉西北行二百餘里至此齒峯特拔其支山西出走哈喇

額爾齊斯郭勒哈喇圖郭勒之間

庫爾圖達巴

庫爾圖達巴在古爾畢達巴西北一百里山脉相屬哈喇額爾齊斯郭勒發源西麓其支山西出走哈喇額爾齊斯郭勒奇喇郭勒之間

阿勒坦鄂拉

阿勒坦鄂拉舊音阿爾泰為古金山在庫爾圖達巴西北三百里哈柳圖郭勒發源西南麓山脉自

庫爾圖達巴屈折至此其迤東境峰巒層沓亘數
百里為北路名山之冠東為舊藩喀爾喀蒙古諸
部西為準噶爾部乾隆二十年大兵討準噶爾道
出阿勒坦鄂拉遣官祭告

告祭阿勒坦鄂拉文

朕恭承

鴻業撫馭寰區康乂柔懷中外一視準噶爾部落向遠王
化篡弒相仍因而內亂達瓦齊又復殘虐其屬分崩離

析人不聊生雖在殊荒均之赤子朕何忍不為拯救坐
視阡危爰整王師分道並進今北路大兵道出神境惟
神起幹西北綿亘東南實塞外之名區作內藩之屏障
尚其默相翼我明威期迅奏乎膚功永教寧夫遠服虔申
昭告用布馨香惟神鑒焉乾隆二十年月日

北魏蠕蠕傳 那蓋出自金山累有勝捷國人咸以

那蓋為天所助乃殺豆崙母子那蓋襲位號候其
伏代庫者可汗自稱太安元年子伏圖立號他汗

可汗伏圖西征高車為高車王所殺子醜奴立禽
其王殺之盡并叛者國遂彊盛

隋書突厥傳 姓阿史那氏後魏太武滅沮渠氏阿
史那以五百家奔茹茹世居金山工於鐵作金山
狀如兜鍪俗呼兜鍪為突厥因以為號西突厥大
邏便彊盛東距都斤西越金山

唐書突厥傳 車鼻亦阿史那族而突利部人也頡
利敗薛延陀稱可汗乃往歸焉延陀將殺之乃遜

去竄金山之北自稱乙注車鼻可汗西葛邏祿北
結骨皆并統之延陀後衰車鼻勢益張右驍衛郎
將高侶擊之攻阿息山追至金山獲之景雲中葛
邏祿胡屋鼠尼施三姓大漠都督特進朱斯陰山
都督謀落匄雞元池都督蹋實力胡鼻率衆內附
詔處其衆於金山回鶻傳薛延陀乙失鉢為野啞
可汗在金山者西役葉護可汗乙失鉢孫夷男率
其部稍東保都尉隸山獨邏水之陰東室韋西金

山南突厥北瀚海

按蒙古語謂金為阿勒坦與阿爾泰音相近更以方位考之阿勒坦鄂拉即古金山無疑也蠕蠕主那蓋西出金山而立國應在今阿勒坦鄂拉之西更以高車傳彌俄特與伏圖戰於蒲類海北之文証之則自阿勒坦鄂拉西南迄天山之北皆其境壤突厥世居金山因兜鍪之狀以為國號而邏便越金山之西車鼻窠金山之北皆

以金山為望鎮者至葛邏祿三姓本處
金山西境因其內附徙衆居之薛延陀
乙失鉢未遷之前本處金山西南是以
西役葉護至夷男東徙乃與回紇均以金
山為西界焉

烏可克達巴

烏可克達巴在阿勒坦鄂拉東

阿拉克鄂拉

阿拉克鄂拉在阿勒坦鄂拉西三百餘里西南距
烘和圖淖爾四十里山脉與阿勒坦鄂拉東西相
屬乾隆二十年大兵討準噶爾二十二年追討阿
睦爾撒納至此皆遣官祭告

告祭阿拉克鄂拉文

朕恭承

鴻業撫馭寰區康乂柔懷中外一視準噶爾部落向遠王
化篡弑相仍因而內亂達瓦齊又復殘虐其屬分崩離

析人不聊生雖在殊荒均之赤子朕何忍不為拯救坐
視阡危爰整王師分道並進今西路大兵道出神境惟
神雄標兌域秀峙坤維磅礴鍾靈綿延西幹尚其默相
翼我明威期迅奏乎膚功永救寧夫遠服虔申昭告用
布馨香惟神鑒焉乾隆二十年月日

朕纘承

祖緒中外一家撫順討逆式昭柔遠之模布德宣威丕振
詰戎之畧茲以西陲小醜負恩作叛煽惑邊疆實自外

於生成斷難寬夫勦戮爰命定邊將軍喀爾喀札薩克
和碩親王成衮扎布整師鞠旅盡掃餘氛大軍道出神
境惟神建標兌域挺秀坤維磅礴鍾靈崔嵬綿亘尚其
明昭翊應默佑膚功期計日以執俘幸彰武績用寧邊
而敷化誕擴鴻圖敬薦馨香惟神鑒格乾隆二十二年
月日

博克達烏魯罕鄂拉

博克達烏魯罕鄂拉在阿拉克鄂拉南三十里西

距烘和圖淖爾三十里

薩爾巴噶什達巴

薩爾巴噶什達巴在阿勒坦鄂拉西南一百餘里

古爾班奇喇鄂拉

古爾班奇喇鄂拉在薩爾巴噶什達巴南一百里

奇喇郭勒尼斯庫郭勒出其西麓

阿爾察克鄂拉

阿爾察克鄂拉在古爾班奇喇鄂拉南五十里

阿斯哈圖

阿斯哈圖達巴在古爾班奇喇鄂拉西二百里奇喇河南哈喇額爾齊斯河北哈爾巴郭勒出其南麓博喇濟郭勒出其西麓

按自薩爾巴噶什達巴至此皆自阿勒坦鄂拉分支西走額爾齊斯支河之間

朱爾庫朱鄂拉

朱爾庫朱鄂拉在烘和圖淖爾西南八十里山脉

自必濟鄂拉北古爾畢達巴南分支西出走青吉
勒河北額爾齊斯河南六百餘里折而西北行四
百里至此北路羣山之次高者山北有水東南流
匯為小澤乾隆二十年大兵進討準噶爾遣官祭
告

告祭朱爾庫朱鄂拉支

朕恭承

鴻業撫馭寰區康乂柔懷中外一視準噶爾部落向遠王

化篡弒相仍因而內亂達瓦齊又復殘虐其屬分崩離
析人不聊生雖在殊荒均之赤子朕何忍不為拯救坐
視阡危爰整王師分道並進今北路大兵道出神境惟
神幹連北界勢控西陲雄峙邊隅鬱為要隘尚其默相
翼我明威期迅奏乎膚功永救寧夫遠服虔申昭告用
布馨香惟神鑒焉乾隆二十年月日

按阿勒坦鄂拉西南羣山縈落而朱爾庫朱鄂
拉厥名較著處烘和圖淖爾之西南唐書葛邏

祿部跨僕固振水包多但嶺僕固振水為今烘

和圖淖爾

說見水

則多但嶺應於此山為近是矣

塔爾巴噶台鄂拉

塔爾巴噶台鄂拉在朱爾庫朱鄂拉西北一百里

山脉相屬為準境北屏山有特里特額達巴尤稱

險隘乾隆三十一年秩於祀典每歲春秋致祭

歲祭塔爾巴噶台鄂拉文

維神衍脉天山效靈中土表崇高於北徼標形勝於西

陞夙稱邊塞之屏藩聳重巒而特出永作鴻圖之拱衛
環疊嶂以相維瑞靄祥氛答四時之靈貺升香薦幣昭
萬載之懷柔秩祀攸隆洪庥丕著

按自此西南行為鄂爾和楚克鄂拉其脉自博
羅塔拉北山東行至此始合

巴爾巴什鄂拉

巴爾巴什鄂拉在迪化州城西北三十里

通古斯巴什鄂拉

通古斯巴什鄂拉在巴爾巴什鄂拉西二十里迪
化州北境

宋王延德高昌行紀

北廷北山中出礪砂山中嘗

有烟氣涌起無雲霧至夕光燄若炬火照見禽鼠
皆赤采者著木底鞣取之皮者即焦下有穴生青
泥出穴外即變為砂石土人即以治皮

按迪化州為唐北庭

亦作北廷

宋時山北并隸高昌

而北廷之稱不改則所謂北廷北山當屬今迪

化州即烏魯木齊北境之山考其方位宜與
巴爾巴什通古斯巴什諸山相近又隋書西
域傳載阿羯山應即唐書龜茲國北之阿羯
田山史亦稱其有煙火出硎砂疑延德所記
有不定屬於烏魯木齊北境者或自今之烏
魯木齊以西迄於阿克蘇北山皆屬天山正
幹地氣積厚當時產吐烟燄有大畧相同者
是以諸書紀載率多近似不妨兩存之以

備考證

雅瑪里克鄂拉

雅瑪里克鄂拉在昌吉郭勒西羅克倫郭勒東
昌吉縣治西南五十里當孔道南

阿顏台和洛鄂拉

阿顏台和洛鄂拉在雅瑪里克鄂拉西四十里
羅克倫郭勒西當孔道南

巴顏哈瑪爾鄂拉

巴顏哈瑪爾鄂拉在阿顏台和洛鄂拉西五十里
呼圖克拜郭勒西圖古里克郭勒東河源發於北
麓當孔道南

博羅哈瑪爾鄂拉

博羅哈瑪爾鄂拉在巴顏哈瑪爾鄂拉西七十里
哈齊克郭勒西陽巴勒噶遜南和屯博克達鄂拉
北當孔道南

奇喇圖魯鄂拉

奇喇圖魯鄂拉在博羅哈瑪爾鄂拉西五十里瑪
納斯郭勒西烏蘭烏蘇東當孔道南

阿爾噶里圖鄂拉

阿爾噶里圖鄂拉在奇喇圖魯鄂拉西二百里奎
屯西北庫爾郭勒東當孔道南

按自巴爾巴什鄂拉至此皆附近天山之分支
在迪化州迤西五百里之間

哈喇古顏鄂拉

哈喇古顏鄂拉在額布圖達巴西北二百里晶郭勒南哈什郭勒發源南麓山脉自額布圖達巴折北而西為天山分支至此孤峰聳豎

博羅布爾噶蘇鄂拉

博羅布爾噶蘇鄂拉在哈喇古顏鄂拉西一百里入東谷口西行三十里為覺羅托海又西南一百一十里為額博爾濟達巴又西九十里為塞特爾台哈喇海其地皆在山谷中又九十里出西谷口

於是全山之形勢始盡乾隆二十二年六月將軍
成袞扎布遣副都統由屯等窮追逆賊呢嗎至額
博爾濟達巴口擒之殲其衆二百餘獲馬駝牛羊
七百餘所部乃平

阿布喇勒鄂拉

阿布喇勒鄂拉在博羅布爾噶蘇鄂拉南由天山
正幹之額布圖達巴分支迤西北行在喀什郭勒
空格斯郭勒兩河環帶間當伊犁正東面乾隆二

十八年秩於祀典每歲春秋致祭

歲祭阿布喇勒鄂拉文

惟神秀甲金方勝標玉塞崇岡起伏從蔥嶺以分支疊
嶂峻嶒界烏孫而作鎮近通喀什遠控伊犁納喇特峙
其陽翠屏儼對空格斯繞其左碧水如環緬靈異之夙
傳宜馨香之式薦朕丕昭武畧龕定遐荒昧谷之西遣
亥章以測日輪臺以外駐戍已而開屯乃眷名山實稱
福地犁庭露布久徵默佑之功觸石雲興允著懷柔之

效緬販章之式關庶沙磧之永寧嘉貺聿臻明禋肇舉
刊旅未詳於禹貢始知際會有期履懸載考夫周官益
信報功不爽春秋望秩瞻峻極於北庭風雨和甘垂祐
庶於西海自今以始申錫無疆

塔勒奇鄂拉

塔勒奇鄂拉在博羅布爾噶蘇鄂拉西北山形迤
邐西南相屬庫色木蘇克郭勒發源西麓塔勒奇
郭勒發源南麓其東谷口在察罕拜牲城西七十

里托里西一百二十里南谷口距東谷口一百八
十里由南谷口外一百里至伊犁郭勒北岸之阿
里瑪圖為博羅塔拉之南山踰山而南即哈什空
勒斯地乾隆二十八年秩於祀典每歲春秋致祭
歲祭塔勒奇鄂拉文

惟神保障金方安敦兌域南屏拱抱沿山之鄂博星羅
北渚迴環傍水之謨多錦簇源泉有本開一鑑於峰頭
烟火相望聳孤城於遙岸形勢冠諸絕域典物錫以隆

文朕遠服咸賓西戎即叙壺漿載道受蕃長之來降旗鼓
分馳擒叛臣之往竄默孚神貺迅奏膚功設百雉之雄
關弓懸新月導雙流之谷口馬飲清泉爰錫履懸用申
望秩屆春秋而頒帛慶雉譯之咸通諏辛甲以薦馨保
鴻圖之常固尚其昭格永克歆承

博羅和洛鄂拉

博羅和洛鄂拉在塔勒奇鄂拉南谷口西北一百
里博羅塔拉西南二百里鄂拓克賽里郭勒發源

東麓

烘郭爾鄂博

烘郭爾鄂博

鄂博謂壘石為祭處

在博羅和洛鄂拉西山脈

自額布圖達巴分支西行至此又分二支其西北

一支曲折五百里北至格登鄂拉西至莎達巴其

東北一支統博羅塔拉西北折而東行至鄂爾和

楚克鄂拉與阿勒坦西來之山脉相接乾隆二十

八年秩於祀典每歲春秋致祭

歲祭烘郭爾鄂博文

惟神鍾靈地絡分幹天山南眺伊犁與塔勒奇以並峙
西通蔥嶺鎮衛拉特以稱雄符良德之安敦助宣元化
臨兌方而聳拔夙著神威沙暖草肥洵真靈之秘宅巒
環谷抱實絕域之隩區朕拓地烏孫洗兵魚海單于繫
頸三捷成掃穴之勛貳負陳尸列戍息傳烽之警選重
臣以留鎮度沃壤以興屯益恢一統之模爰秩百神之
祀曩者籌邊五夜曾識聚米之形今茲刊旅九山長作

維屏之固迺咨祠部載練吉辰典禮肇稱薦馨香以昭
格懷柔式應配嶽鎮以尊崇補山海之圖經傳於奕禩
表渠支之疆域綏我邊黎用奠清樽永垂鴻祐

唐書突厥傳定方追賀魯至雙河距賀魯牙二百
里陣而行抵金牙山賀魯衆適獵定方縱兵破其
牙俘數萬人獲鼓纛器械

按博羅和洛鄂拉烘郭爾鄂博為博羅塔拉之
西屏博羅塔拉為賀魯牙則所云金牙山應與

此相近

薩勒巴圖烏蘭布喇達巴

薩勒巴圖烏蘭布喇達巴在博羅和洛鄂拉北一
百里博羅塔拉西

罕哈爾察海鄂拉

罕哈爾察海鄂拉在博羅和洛鄂拉北二百里當
博羅塔拉之西北境鄂拓克賽里郭勒發源東麓
察林郭勒發源西麓

庫克托木達巴

庫克托木達巴在罕哈爾察海鄂拉東北博羅塔

拉北

阿勒坦特布什鄂拉

阿勒坦特布什鄂拉在罕哈爾察海鄂拉東二百

里博羅塔拉西北一百五十里舊為準噶爾塔爾

巴哈沁部游牧處係賽音伯勒克之昂吉宰桑烏

魯木亦游牧其地乾隆二十年五月大兵進討伊

犁烏魯木以四百餘戶內附

巴爾魯克鄂拉

巴爾魯克鄂拉在布爾哈齊淖爾東北一百五十里為塔爾巴噶台之西屏綽諾布拉克發源西北麓踰山接哈薩克境乾隆三十一年秩於祀典每

歲春秋致祭

歲祭巴爾魯克鄂拉文

維神列方兌位合鎮坤維疊蒼翠於層巒陰鬱葱之嘉

木虬枝吐秀靈蹤標太華而遙雲葉交陰勝蹟紀流沙
之外奠新疆而永固保障斯存護邊塞以垂庥馨香特
薦尚希來格永享明禋

鄂爾和楚克鄂拉

鄂爾和楚克鄂拉在巴爾魯克鄂拉東北四百里
綽爾郭南納林和博克北布隆郭勒發源北麓達
敏郭勒烘郭爾布拉克發源南麓

按自此東北行一百五十餘里與朱爾庫朱鄂

拉相接其南行一支入沙磧者為薩里鄂拉色
伯蘇台鄂拉

薩里鄂拉

薩里鄂拉在鄂爾和楚克鄂拉東一百里南臨沙
磧

色伯蘇台鄂拉

色伯蘇台鄂拉在納林和博克東北十里山脉自
鄂爾和楚克鄂拉分支東南行百餘里至此又南

行入於沙磧

呼察斯阿爾噶里圖鄂拉

呼察斯阿爾噶里圖鄂拉在罕哈爾察海鄂拉西
北三百餘里濱巴勒喀什淖爾

按此自罕哈爾察海鄂拉西北行者別為一小
支

察罕布古圖鄂拉

察罕布古圖鄂拉在伊犁郭勒北一百里山脉自

博羅和洛鄂拉分支西北三百里至此庫克烏蘇源出其北麓

庫隴奎鄂拉

庫隴奎鄂拉舊音庫隴癸在察罕布古圖鄂拉西南一百里伊犁郭勒北哈討北境庫克烏蘇郭勒發源北麓山脉自博羅和洛鄂拉西北行三百餘里至此乾隆二十三年三月將軍兆惠追討阿睦爾撒納有喀拉沁宰桑昂克圖多和落特宰桑布

庫圖噶爾雜特宰桑特克爾得克阿爾坦沁宰桑

塔爾巴者率二千餘戶由和爾郭斯

舊音和落霍斯

敗北

至伊犁郭勒東之哈討將渡河聞大兵至往據庫

隴奎鄂拉將軍兆惠策卜登扎卜富德等分道夜

半擊之時大霧迷漫賊倉猝棄輜重赤身走山巖

間施鎗石抵禦學士溫福副將高天喜各挾一礮

登於山以擊賊之在山者皆死兆惠等從之賊大

潰殺塔爾巴獲昂克圖餘衆盡殲獲輜重無算布

庫圖特克爾得克僅以身竄

格登鄂拉

格登鄂拉在庫隴奎鄂拉北一百八十里庫克烏蘇東七十里乾隆二十年五月將軍班第等平伊犁達瓦齊以萬餘衆西走保格登鄂拉後踞山根前臨泥淖西北兩路官兵各據形勢整陣以待十四日遣翼長阿玉錫厄魯特章京巴圖濟爾噶爾宰桑察哈什等以銳兵二十二人夜襲達瓦齊

將及阿玉錫突其營鎗矢並發聲震山谷出賊不
意乃大潰亂自相蹂躪無一人敢撻吾鋒者擒其
台吉二十宰桑四宰桑子弟二十五人達瓦齊率
其濟拉特怯五百餘所部兵二千諸鄂拓克兵四
千餘竄至黎明悉收撫之達瓦齊僅以身免是役
也以二十五人敗六千餘衆阿玉錫之功居最焉
且手撤達瓦齊所居帳及礮六位而還

天子壯其勇作阿玉錫歌製紀功碑文勒石山巖乾隆

二十五年遣官致祭每歲春秋秩於祀典

御製阿玉錫歌

乙亥

阿玉錫者伊何人準噶爾屬司牧臣其法獲罪應剉臂
何不即斬犯厥尊徒步萬里來向化育之塞外

先朝恩

事在雍正十一年

薩拉爾來述其事云即彼中勇絕倫持

銃迎面未及發直進手奪無逡巡名見賜銀擢侍衛即
命先驅清漠塵我師直入定伊犁達瓦齊聚近萬軍鼓
其螳臂欲借一依山據淖為營屯我兩將軍

阿睦爾撒納薩拉爾

重諮議以此衆戰玉石焚廟謨本欲安絕域捷伐毋乃

違皇仁健卒掄選二十二曰阿玉錫統其羣曰巴圖濟

爾噶爾

去年投誠封郡王訥墨庫屬之章京也

及察哈什副以進

叶此

師至伊犁新投誠之宰桑

阿玉錫喜曰固當

去聲

廿五人氣摩青旻銜

枚夜襲覘賊向如萬祖父臨兒孫大聲策馬入敵壘厥

角披靡相躡奔降者六千五百騎阿玉錫手大燾拳達

瓦齊攜近千騎駝走喙息嗟難存荆軻孟賁一夫勇徒

以藉其人稱論神勇有如阿玉錫知方亦復知報恩今

我作歌壯生色千秋以後斯人聞

御製平定準噶爾勒銘格登山碑文

格登之崔嵬賊固其壘

叶

我師堂堂其固自摧格登之

巖薛賊營其穴我師洸洸其營若綴師行如流度伊犁

川粵有前導為我具船渡河八日遂抵格登面淖背巖

藉一昏冥曰擣厥虛曰殲厥旅豈不易將韜我武將

韜我武詎曰養寇曰有後謀大功近就彼衆我臣已有

成辭火炎崑岡懼乖皇慈三巴圖魯二十二卒夜斫賊

營萬衆股栗人各一心孰為汝守汝頑不靈尚竄以走
汝竄以走誰其納之縛獻軍門追悔其遲於恒有言曰
殺寧育叶受俘赦之光我擴度漢置都護唐拜將軍費
賂勞衆弗服弗臣既臣斯恩既服斯義勒銘格登永詔
億世

告祭格登鄂拉文

詰戎龕暴斬遐邇之綏安蕩穴焚巢荷神人之協應乃
者準噶爾以諸蕃瓦解款塞請兵達瓦齊當累世貫盈

負嶠假息方王師壓境窮鱗尚戀泥蟠而裨將選鋒鍛
羽難延株守廿五騎自天而下不藉梯衝十千人無地
可容悉縻纓組溯國威之遠暢瞻神貺之丕昭緬爾時
呵護斯存曾著翻營勝蹟迨今日屐懸用薦還依表碣
雄風秩我明禋惟神歆格乾隆二十五年月日

歲祭格登鄂拉文

惟神位正金方勢崇西極鎮準噶爾之全部夙著靈竒
導岡底斯之羣峰丕宣氣化職方未載乃應運而服懷

柔王會新圖早報功而行刊旅從龍在望報饗宜虔朕
爰定遐荒削平大漠負陰抱陽之類莫不尊親出雲降
雨之司咸同覆載惟格登山之雄峙環伊犁河以高騫
地險爰標神功攸懋當奪壘擒生之日助王旅以宣威
值磨崖紀績之辰翼

天府而效順作屏遠服載揚赫濯聲靈考制名山用展殷
懸典物令先期而諏吉俾時享以薦馨康我邊陲永秩
春秋之祀表茲絕域式垂山海之經雉譯咸通鴻圖常

固聿將芬苾庶克歆承

阿勒坦額墨爾鄂拉

阿勒坦額墨爾鄂拉在格登鄂拉西南與莎達巴
接薩木爾郭勒策集郭勒奎屯郭勒左右環帶乾
隆二十八年秩於祀典每歲春秋致祭

歲祭阿勒坦額墨爾鄂拉文

惟神鎮定邊隅奠寧朔漠東接格登之險疊嶂峇堯南
通莎嶺之雄排雲峭崿坤元協吉色偏應乎乾金艮止

常安位乃居乎坎水洵伊犁之保障宜裡祀之優崇朕
撫恤準夷綏來蕃部自古職方有典未服懷柔於今王
會新圖如親刊旅惟茲山之雄峙為絕域之殊觀襟帶
環流束銀濤於策集屏藩拱列連碧燾之和羅特詔祠
官用頒制帛牲牢具備遙申徧望之誠俎豆維馨永著
宸懸之典神其來格鑒此明裡

莎達巴

莎達巴在阿勒坦額墨勒鄂拉西南濱伊犁郭勒

東北岸自庫隴奎鄂拉以下至此皆在巴勒喀什
淖爾南伊犁郭勒環抱之間

按自察罕布古圖鄂拉至此為博羅和洛鄂拉
西北支

他巴爾遜達巴

他巴爾遜達巴在伊犁郭勒西南三百里東距特
克斯郭勒源二百里西距圖斯庫勒一百里其脉
從汗騰格里鄂拉西行一百里至此

察察圖達巴

察察圖達巴在伊犁郭勒西一百五十里嶺脉從他巴爾遜達巴稍西北行旋折東北八十餘里至此

圖賚愛古爾鄂拉

圖賚愛古爾鄂拉在察察圖達巴北四十里伊犁

郭勒北

布喀鄂拉

布喀鄂拉在圖賚愛古爾鄂拉西北伊犁郭勒南
唐書突厥傳伊列河以西受令於咄陸咄陸可汗
建廷鏃曷山西

按龜茲為今庫車伊犁居其直北隋書載龜茲
國西北六百餘里為突厥牙似其牙在今伊犁
郭勒西唐伊列河即今伊犁河也然突厥本傳
又云小可汗居龜茲北其地曰應婆似所謂應
婆者仍即今之伊犁惟唐書載西突厥又分二

國西部自立欲谷設為乙毗咄陸可汗建北廷
於鏃曷山西是與啞利失部因伊列河為界者
所謂鏃曷山必當在伊列河西矣今之布喀鄂
拉東薄伊犁郭勒而又近北唐伊列河西之北
廷宜建於此若葉護可汗建廷雖合水北謂之
南廷雖均在今伊犁郭勒西而南北不同又不
可以不辨

墨爾根西里鄂拉

墨爾根西里鄂拉在伊犁郭勒西南三百里山脉
自他巴爾遜達巴西北行瀕圖斯庫勒北岸西行
二百餘里折而北行一百里至此塔拉錫克郭勒
發源山麓

阿圭鄂拉

阿圭鄂拉在墨爾根西里鄂拉北四十里伊犁郭
勒西古爾班阿里瑪圖布拉克發源北麓

阿斯哈達巴

阿斯哈達巴在阿圭鄂拉西北五十里伊犁郭勒西南阿斯哈郭勒發源南麓圖爾根布拉克發源北麓古爾班察布達爾布拉克發源東麓

伊爾該圖鄂拉

伊爾該圖鄂拉在阿斯哈達巴西北五百里伊犁郭勒下流西奎屯郭勒發源東麓山脉自墨爾根西里鄂拉西行近傍伊犁郭勒西南二面連山相次曲折至此又西北入於沙磧

渾都賴鄂拉

渾都賴鄂拉在圖斯庫勒西北吹郭勒北岸山脉
從圖斯庫勒北岸諸山分支及此

庫古里克鄂拉

庫古里克鄂拉在渾都賴鄂拉東北一百里

烏可克達巴

烏可克達巴在薩瓦布齊鄂拉西北卓哈達巴北
一百餘里圖斯庫勒西面支河發源於此

額得墨克達巴

額得墨克達巴在烏可克達巴西一百里與圖斯庫勒南境之山東西相屬嶺北泉流競發即塔拉斯郭勒源也由是西行折北當塔拉斯西南岸連山相次

庫穆什鄂拉

庫穆什鄂拉在額得墨在額得墨克達巴西二百里庫穆什郭勒發源東麓

哈喇布拉克達巴

哈喇布拉克達巴在庫穆什鄂拉西二百里哈喇
布拉郭勒發源東北麓

呼巴海鄂拉

呼巴海鄂拉在烏可克達巴北一百五十里圖斯
庫勒西北吹郭勒環抱之間哈喇郭勒發源西麓
漢書西域傳烏孫國大昆彌治赤谷城溫宿國北
至烏孫赤谷六百一十里

魏書西域傳烏孫國治赤谷城在龜茲西北

唐書地理志度拔達嶺又五十里至頓多城烏孫所治赤山城也碎葉水北四十里有羯丹山十姓可汗每立君長於此

按烏孫赤谷城即赤山城班史不詳其方位而溫宿國為今阿克蘇則較然無疑據溫宿北至赤谷六百里魏書在龜茲西北之文証以唐書度拔達嶺五十里至赤山城之說則今阿克


蘇北六百里外之呼巴海鄂拉當即所謂赤谷
一名赤山亦曰羯丹山是也呼巴海鄂拉東薄
圖斯庫勒則自此以西為五弩失畢部所謂置
五大俟斤居碎葉西者也

巴噶布魯勒鄂拉

巴噶布魯勒鄂拉在塔拉斯郭勒下流之西阿爾
沙郭勒東

伊克布魯勒鄂拉

伊克布魯勒鄂拉在阿爾沙郭勒西與巴噶布魯
勒鄂拉東西相距二百餘里由是西北行沙磧彌
望中時露峰嶺瞻望綿邈不知紀絕



欽定皇輿西域圖志卷二十二